

玉清無上靈寶自然北斗本生真經

七神童子

天蓬 天內 天衝 天輔
天禽 天心 天柱

步虛讚

寶鼎香微爇 氤氲滿太虛
群仙臨凡世 聖衆下瑤宮
彩鳳鳴天樂 祥麟駕玉驄
步虛聲已澈 稽首禮金容

玉清無上靈寶自然北斗本生真經

三十六天大司命宸京保命大天帝君下傳

洪惟，大道浩浩，赤明元始開圖，化導群有，現大光明，照百千界，於玉清皇極宮中，放種種光明，所謂金藏雲光，玉藏雲光，珠藏雲光，海藏雲光，香藏雲光，花藏雲光，火藏雲光，五行之光，周遍天下，下及人寰，上則萬二千天，下則八千萬國，莫不承我元始之力，一時雲集，聽說無上至真妙道，元始上帝，太極真尊，撫明雲几，下觀大衆，發大梵音，如大天鼓，震響

十方，天上天下，一時皆謂，元始上帝，與我獨語，莫不歡喜誠服，聽受元始上帝，乃敷奧義，大發至真之淵，淪披迷雲之日月，其時龍音雷吼，駭聽動心，

道曰一心玄微，廣包萬景之多，一心所受，表里洞然，本無留礙，生死去來，如影如夢，緣何倒置，認此為真，淪沒妄波，不能出離，方說是法時，有真人從座而起，虔恭百拜，仰瞻威容，告真尊曰，臣名寶上，諸天子中，最為第一，今有微願，望賜開弘，臣所願也，中天七星，巍巍

赫奕，統御群曜，幹旋炁運，斟酌死生，威力至重，以何因緣，殊勝第一，起自何劫，始終之化，願詳聞之，真尊歎曰，大哉汝之問也，在昔龍漢，有一國王，其名周御聖德，無邊時人，稟受八萬四千大劫，王有玉妃，名哲慈慧，號曰紫光夫人，誓塵劫中，已發至願，願生聖子，輔佐乾坤，以裨造化，後三千劫，於此王出世，因上春日，百花榮茂之時，遊戲後苑，至金蓮花溫玉池邊，脫服澡盥，忽有所感，蓮花九包應時開發，化生九子，其二長子是為，天皇大帝，紫

微大帝，其七幼子，是為貪狼、巨門、祿存、文曲、廉貞、武曲、破軍之星，或善或惡，化導群情，於玉池中，經于七日七夜，結為光明，飛居中極，去地九千萬里，化為九大寶宮，二長帝君，居紫微垣，太虛宮中，勾陳之位，掌握符圖，紀綱元化，為衆星之主領也，昔大願往此剛強世界，七千萬劫，方還玉清，紫光夫人，亦號北斗九真聖德天后，道身玄天大聖真后，應現上天南嶽，是名慶華紫光赤帝之尊。若有信心男女，能於上春日，一心齋戒，肅爾神明，設九光

醮，迎請紫光聖母，并七元君，虔恭奏獻，縱有多劫十惡重罪，冤家苦報，如九日輪照於冰山，應時消釋，上至國王大臣，下及民庶，能奉之者，感獲景況，福壽增延無量，天真俱來擁衛，見世圓滿，子孫昌盛，命終之后，超生大梵真天。世上之士，若能常誦《九光真經》，設九光醮，持紫光名，智慧福壽，如彼甘泉，隨汲隨發，受用無盡，此功德藏，世間第一，汝當傳布，助我道風，寶上真人，既聞金口所宣，與諸天衆，莫大歡躍，感謝鴻恩，各起心念，我等當供

養真尊，真尊之恩，如父如母，難以報稱，於是各運神通，就玄空中散百千萬種光明，寶藏無量光明，寶香無量光明，寶雲無量光明，寶雨無量光明，天樂不鼓自鳴，并合節奏，無量大寶光明宮殿，旋空而下，至真尊前而為貢獻，無鞅真聖，萬口一辭，讚揚真梵，口稱偈曰：

巍巍元始尊 神通居第一
世間無與比 如日照萬天
智慧廣方便 而能代有生
我等以萬身 身身俱萬舌

以讚真尊道 窮劫不能盡
仁哉紫光天 善能變現身
男形或女形 應機而接物
歸命北極母 無盡功德海
永為盲者目 照耀於今古
功德與元始 通為內外化
陶鎔大法器 普成無量真

寶上真人，與諸天眾說是偈畢，一切天神敬禮
真尊，奉辭而退。

玉清無上靈寶自然北斗本生真經

注：

此經咒能消災解冤劫，化於無形，天之秘法，神助也，能誦能知，能解能明，誦多有效，達上蒼，考心誠，經有效，因人而異，因事而解，誠真可合，真誠真効。